



**BOSNA I HERCEGOVINA
FEDERACIJA BOSNE I HERCEGOVINE
URED ZA REVIZIJU INSTITUCIJA U FBIH
SARAJEVO**

Ložionička 3, 71000 Sarajevo, Tel: + 387 (0)33 723 550, Fax: 716 400, www. vrifbih.ba, e-mail: urrevfed@bih.net.ba, vrifbih@vrifbih.ba

**IZVJEŠTAJ O REVIZIJI FINANSIJSKIH IZVJEŠTAJA
FEDERALNOG MINISTARSTVA OBRAZOVANJA I NAUKE**

na dan 31.12.2009.godine

Broj: 03-11/10

Sarajevo, maj 2010. godine

**MENADŽMENTU
FEDERALNOG MINISTARSTVA OBRAZOVANJA I NAUKE****NEZAVISNO REVIZORSKO MIŠLJENJE*****Osnova za reviziju***

Izvršili smo reviziju finansijskih izvještaja **Federalnog ministarstva obrazovanja i nauke** za 2009. godinu (bilansa stanja na dan 31. decembar 2009. godine i odgovarajućeg računa prihoda i rashoda, izvještaja o izvršenju budžeta za godinu koja se završava na taj dan), te reviziju usklađenosti poslovanja sa važećim zakonskim i drugim relevantnim propisima i pregleda značajnih računovodstvenih politika i drugih napomena uz finansijske izvještaje.

Odgovornost rukovodstva

Rukovodstvo Federalnog ministarstva obrazovanja i nauke odgovorno je za izradu i fer prezentaciju finansijskih izvještaja u skladu sa posebnim propisima u Federaciji o računovodstvu i finansijskom obavještavanju u javnom sektoru. Ova odgovornost obuhvata: kreiranje, primjenu i održavanje internih kontrola koje su relevantne za pripremu i fer prezentaciju finansijskih izvještaja koji ne sadrže materijalno značajne pogrešne iskaze nastale uslijed korupcije i prevare, odabir i primjenu odgovarajućih računovodstvenih politika i računovodstvene procjene koje su razumne u datim okolnostima. Rukovodstvo je također odgovorno za usklađenost poslovanja Federalnog ministarstva obrazovanja i nauke sa važećim zakonskim i drugim relevantnim propisima.

Odgovornost revizora

Naša je odgovornost da izrazimo mišljenje o finansijskim izvještajima na osnovu provedene revizije. Reviziju smo izvršili u skladu Zakonom o reviziji institucija u FBiH ("Sl. novine FBiH", broj 22/06), INTOSAI revizijskim standardima i Međunarodnim standardima revizije. Ovi standardi nalažu da radimo u skladu sa etičkim zahtjevima i da reviziju planiramo i izvršimo na način koji omogućava da se, u razumnoj mjeri, uvjerimo da finansijski izvještaji ne sadrže materijalno značajne pogrešne iskaze, te da je poslovanje usklađeno sa važećim zakonskim i drugim relevantnim propisima.

Revizija uključuje sprovođenje postupaka u cilju pribavljanja revizorskih dokaza o usklađenosti poslovanja i o iznosima i objelodanjivanjima datim u finansijskim izvještajima. Izbor postupka je zasnovan na revizorskom prosuđivanju, uključujući procjenu rizika materijalno značajnih pogrešnih iskaza u finansijskim izvještajima. Prilikom procjene rizika, revizor razmatra interne kontrole koje su relevantne za pripremu i fer prezentaciju finansijskih izvještaja, u cilju odabira revizorskih postupaka koji su odgovarajući u datim okolnostima, ali ne u cilju izražavanja odvojenog mišljenja o efektivnosti internih kontrola. Revizija također uključuje ocjenu primijenjenih računovodstvenih politika i značajnih procjena izvršenih od strane rukovodstva, kao i ocjenu opšte prezentacije finansijskih izvještaja

Smatramo da su pribavljeni revizorski dokazi dovoljni i odgovarajući i da obezbjeđuju osnovu za naše revizorsko mišljenje.

Kvalifikacija:

- 1. Nisu se na vrijeme poduzimale adekvatne aktivnosti kako bi se u skladu sa zaključenim ugovorima o finansiranju, izvršila konačna ocjena rada svih nosilaca naučno – istraživačkih projekata finansiranih u prethodnom periodu (Tačka 5.4.4. Izvještaja);**
- 2. Nije izvršen nadzor nad namjenskim korištenjem i raspolaganjem sredstvima Fonda za studentske zajmove za 2009. godinu, koji je u nadležnosti Ministarstva, u skladu sa članom 47. Zakona o udruženjima i fondacijama (tačka 5.6. Izvještaja);**
- 3. Ne može se potvrditi da je raspodjela dijela sredstava Transfera za oblast nauke od značaja za FBiH (za programe „Podrška istraživanju od značaja za FBiH“ (27.100 KM)**

i „Izdavački projekti u oblasti nauke, tehnologije i visokog obrazovanja“ (35.831 KM)) izvršena uz dosljednu primjenu utvrđenih kriterija iz usvojenog Programa utroška sredstava tekućih transfera za 2009. godinu, od strane Vlade FBiH, u skladu sa Zakonom o izvršavanju budžeta FBiH za 2009. godinu. (Tačka 5.4.3 Izvještaja);

Mišljenje

Po našem mišljenju, osim za efekte koje na finansijske izvještaje mogu imati stavke navedene u prethodnom pasusu, finansijski izvještaji **Federalnog ministarstva obrazovanja i nauke**, po svim bitnim pitanjima prikazuju istinito i objektivno stanje imovine i obaveza na dan 31.12.2009. godine, rezultate poslovanja i izvršenja budžeta, za godinu koja se završava na taj dan, u skladu sa prihvaćenim okvirom finansijskog izvještavanja tj. Uredbom o računovodstvu budžeta u FBiH i Pravilnikom o finansijskom izvještavanju i godišnjem obračunu budžeta u FBiH.

Finansijsko poslovanje Federalnog ministarstva obrazovanja i nauke u toku 2009. godine, osim za napomene navedene u tački 2 u prethodnom pasusu, je bilo u svim materijalno značajnim aspektima usklađeno sa važećom zakonskom regulativom.

Bez daljnje kvalifikacije na naše Mišljenje, skrećemo pažnju na sljedeće:

- Na zahtjev Vrhbosanske nadbiskupije, Dom za ljudska prava, donio je Odluku CH/02/9628 kojom je naložio premještanje državnih srednjih škola iz zgrade Nadbiskupske Gimnazije u Travniku, i ista je 04.09.2003. godine postala obavezujuća. Kako bi se implementirala navedena Odluka Doma za ljudska prava, u 2008. godini, Vlada FBiH je Opštini Travnik (putem Ministarstva) dodijelila 5.000.000 KM, za sufinansiranje Projekta izgradnje Srednjoškolskog centra u Travniku. Međutim, za izgradnju Srednjoškolskog centra, odnosno potpunu implementaciju navedene Odluke, potrebno je osigurati još dodatnih 12.000.000 KM, zbog čega je Vlada FBiH 01.02.2010. godine donijela Zaključak V broj 86/2010, kojim se opredjelila da (zajedno sa Vladom Srednjobosanskog kantona i Opštinom Travnik) učestvuje u osiguranju nedostajućih sredstava iz kreditnih izvora i da postigne dogovor sa Vrhbosanskom nadbiskupijom u smislu produženja roka za izmještanje državnih škola. **Nije prezentirana dokumentacija da su nadležni organi i institucije poduzeli adekvatne aktivnosti, u cilju provedbe Odluke Doma za ljudska prava BiH. Prema prezentiranoj dokumentaciji Vrhbosanska nadbiskupija je 12.03.2010. godine uputila Prijedlog za donošenje Rješenja o izvršenju izvršne Odluke Doma za ljudska prava BiH. (Tačka 5.5. Izvještaja).**

Sarajevo, 10.05.2010. godine

Zamjenik generalnog revizora

Branko Kolobarić, dipl. oec

Generalni revizor

Dr. sc. Ibrahim Okanović, dipl. oec.

SADRŽAJ

1.	UVOD	1
2.	PREDMET, CILJ I OBIM REVIZIJE.....	1
3.	REZIME.....	1
4.	OSVRT NA PREPORUKE REVIZIJE ZA 2008. GODINU.....	2
5.	NALAZI I PREPORUKE	4
5.1	Sistem internih kontrola	4
5.2	Budžet za 2009. godinu	5
5.3	Izdaci za materijal i usluge	5
5.4	Tekući transferi	5
5.4.1	Transfer za finansiranje obrazovanja	6
5.4.2	Transfer za finansiranje studentskog standarda.....	7
5.4.3	Transfer za oblast nauke od značaja za FBiH.....	7
5.4.4	Transfer za institucije nauke od značaja za FBiH.....	8
5.5	Nadzor nad namjenskim trošenjem sredstava transfera iz 2007. i 2008. godine	10
5.6	Fond za studentske zajmove.....	12
5.7	KOMENTAR	12
	PRILOG BR. 1.....	1
	Izvršenje budžeta Federalnog ministarstva obrazovanja i nauke na dan 31.12.2009. godine.....	1

IZVJEŠTAJ
O OBAVLJENOJ REVIZIJI FINANSIJSKIH IZVJEŠTAJA
FEDERALNOG MINISTARSTVA OBRAZOVANJA I NAUKE
za 2009. godinu

1. UVOD

Federalno ministarstvo obrazovanja i nauke (u daljem tekstu Ministarstvo), formirano je na osnovu Zakona o federalnim ministarstvima i drugim tijelima federalne uprave («Sl. novine F BiH» broj 19/03, 38/05, 2/06, 8/06, 61/06). Ministarstvo vrši upravne, stručne i druge poslove iz nadležnosti FBiH koji se odnose na: predškolsko, osnovno i srednje obrazovanje; pedagoške standarde i normative prostora, opreme i nastavnih sredstava za predškolsko, osnovno i srednje obrazovanje i odgoj, nostrifikaciju i ekvivalenciju inostranih školskih svjedodžbi i diploma; stručno obrazovanje i usavršavanje nastavnog osoblja; udžbeničku literaturu za osnovno i srednje obrazovanje; naučno - istraživački rad na unapređenju odgojno-obrazovnog rada; standarde i normative za visoko obrazovanje; đачki studentski standard; razvoj naučno - istraživačke djelatnosti; zaštitu autorskog prava i intelektualne svojine; koordiniranje naučno - istraživačkih aktivnosti; razvoj naučno - istraživačkih organizacija; podsticanje fundamentalnih primijenjenih istraživanja, razvoj investicionih tehnologija i kadrova u naučno - istraživačkoj djelatnosti; praćenje inovacija, razvoja i unapređenja tehnologija i ostalih poslova utvrđenih zakonom.

Radom Ministarstva rukovodi ministar i odgovoran je za rad istog. Unutrašnja organizacija i način rada Ministarstva utvrđeni su Pravilnikom o unutrašnjoj organizaciji na koji je Vlada FBiH dala saglasnost.

Sredstva za rad Ministarstva su obezbjeđena Budžetom FBiH. Pravilnikom o unutrašnjoj organizaciji Ministarstva sistematizovano je 50 radnih mjesta, budžet je odobren za 46 uposlenih, a stvarni broj zaposlenih na dan 31.12.2009. godine iznosio je 47.

Sjedište Ministarstva je u Mostaru, u ulici Stjepana Radića 33.

2. PREDMET, CILJ I OBIM REVIZIJE

Predmet revizije su finansijski izvještaji Ministarstva za 2009. godinu i usklađenost poslovanja sa važećim zakonskim i drugim relevantnim propisima.

Cilj revizije finansijskih izvještaja je da omogući revizoru da izrazi mišljenje o finansijskim izvještajima koji su predmet revizije, tj. da li finansijski izvještaji u materijalno značajnom smislu, objektivno i istinito prikazuju finansijsko i materijalno stanje Ministarstva na dan 31.12.2009. godine, izvršenje budžeta za godinu koja se završava na taj dan, da li je poslovanje usklađeno sa važećim zakonskim i drugim relevantnim propisima, da li je trošenje javnih sredstava namjensko, te da li su finansijski izvještaji sačinjeni u skladu sa posebnim propisima o računovodstvu i finansijskom izvještavanju u javnom sektoru.

Revizija je obavljena u skladu sa internim planskim dokumentima revizije, u periodu od decembra 2009. godine do aprila 2010. godine.

S obzirom da se revizija obavlja ispitivanjem na bazi uzoraka i da postoje inherentna ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške mogu ostati neotkrivene.

3. REZIME

Izvršenom revizijom poslovanja Ministarstva za 2009. godinu konstatovali smo određen broj propusta i nepravilnosti, a u cilju otklanjanja istih dali smo slijedeće preporuke:

- **Raspodjelu sredstava, u okviru Transfera za oblast nauke od značaja za FBiH, za određene programe („Podrška istraživanju od značaja za FBiH“ i „Izdavački projekti u oblasti nauke, tehnologije i visokog obrazovanja“) i dalje vršiti putem javnog oglašavanja, uz korištenje kriterija sa jasno utvrđenim parametrima koji trebaju biti mjerljivi i dokazivi;**

- *Potrebno je poduzeti aktivnosti kako bi se za sve transfere za koje je zaduženo Ministarstvo, utvrdila pravila raspodjele i oblasti koje će se pokrivati iz sredstava svakog transfera, a u cilju onemogućavanja da se isti program istovremeno finansira iz sredstava dva transfera odobrenih Ministarstvu;*
- *Sa krajnjim korisnicima tekućih transfera potpisivati ugovore o izvršenju dodijeljenih sredstava, u kojima će se decidno navoditi međusobna prava i obaveze, kako bi se eventualno mogle poduzeti adekvatne mjere prema onim korisnicima koji nenamjenski utroše sredstva;*
- *Potrebno je da se u skladu sa zaključenim ugovorima o finansiranju naučno – istraživačkih projekata izvrši konačna ocjena rada nosioca naučno – istraživačkih projekata finansiranih u prethodnom periodu, kao i u 2008. godini;*
- *Poduzeti aktivnosti kako bi svi krajnji korisnici dostavili izvještaje o utrošku doznačenih sredstava iz tekućih transfera odobrenih Ministarstvu u 2008. i 2009. godini, a posebno kako bi se u u potpunosti opravdao namjenski utrošak sredstava doznačenih za realizaciju naučno – istraživačkih projekata u 2005/2006. i 2007. godini, a po potrebi i izvijestile nadležne institucije, u cilju zaštite javnih sredstava;*
- *Potrebno je da nadzorna tijela za kontrolu i praćenje namjenskog utroška odobrenih sredstava tekućih transfera, kao i Komisija za praćenje utroška sredstava za izgradnju i rekonstrukciju školskih objekata u FBiH nastave započete aktivnosti obavljanja nadzora, u skladu sa aktom o formiranju istih;*
- *Poboljšati funkcionisanje sistema internih kontrola u cilju otklanjanja utvrđenih nedostataka, donijeti Pravilnik o internim kontrolama, te kontinuirano vršiti nadzor nad provođenjem pisanih internih kontrolnih postupaka i procedura;*
- *Potrebno je vršiti nadzor nad namjenskim korištenjem i raspolaganjem sredstvima Fonda za studentske zajmove, u skladu sa članom 47. Zakona o udruženjima i fondacijama. Pri tome je nužno osigurati da se predmetni nadzor izvrši prije slanja Izvještaja o radu Fonda Vladi FBiH (kao osnivaču), što je svakako potrebno uskladiti sa razmatranjem godišnjeg izvještaja o izvršenju Budžeta FBiH za predmetnu godinu.;*
- *Potrebno je da Ministarstvo, u okviru svojih nadležnosti, i u saradnji sa nadležnim institucijama i organima i dalje poduzima aktivnosti u cilju izvršavanja zaključaka iz Odluke o prihvatljivosti i meritumu Doma za ljudska prava za BiH od 6. juna 2003. godine, broj CH/02/9628, kao i realizacije Zaključka Vlade FBiH od 01.02.2010. godine;*
- *Potrebno je da Ministarstvo, u skladu sa Zaključkom Vlade FBiH, pravovremeno poduzme adekvatne aktivnosti, u cilju namjenskog trošenja doznačenih sredstava Gradu Mostaru za realizaciju Projekta rekonstrukcije zgrade Gradske vijećnice Mostar (3.000.000 KM) i Projekta za početak izgradnje Osnovne škole „Zalik“ u Mostaru (400.000 KM).*
- *Potrebno je da Ministarstvo, u skladu sa zakonskim propisima, u okviru svojih nadležnosti, poduzme adekvatne aktivnosti prema nadležnim institucijama, imajući u vidu da se ne može potvrditi namjensko trošenje sredstava od strane Organizacije demobilisanih boraca odbrambeno – oslobodilačkog rada 1992 – 1995 Općine Centar kojoj su dodijeljena sredstva za realizaciju projekta Sanacije i adaptacije dječijeg obdaništa „Razigrani dani“ u naselju Jezero u Sarajevu u iznosu od 30.000 KM.*

4. OSVRT NA PREPORUKE REVIZIJE ZA 2008. GODINU

Na osnovu izvršene revizije finansijskih izvještaja za 2009. godinu, a u sklopu iste i provjere da li je postupljeno po preporukama datim u prethodnim revizijama, konstatovali smo da:

Ministarstvo nije postupilo po datim preporukama koje se odnosi na:

- Vršenje konačne ocjene rada nosioca naučno – istraživačkih projekata finansiranih u prethodnom periodu, i vrednovanje naučnih rezultata, u skladu sa zaključenim ugovorima o finansiranju naučno – istraživačkih projekata;
- Definisane jasne i dokazive kriterije za raspodjelu sredstva na ime Podrške istraživanju od značaja za FBiH, u okviru Transfera za nauku od značaja za FBiH.

Ministarstvo je djelimično postupilo po datim preporukama koje se odnose na:

- Poboľšanje funkcionisanje sistema internih kontrola u cilju dosljedne primjene zakona i ostalih propisa, kao i donošenja Pravilnika o internim kontrolama (usklađeni postojeći pravilnici i procedure sa Pravilnikom o unutrašnjoj organizaciji);
- Preispitivanje opravdanosti zaključivanja ugovora o djelu, za poslove koji su Pravilnikom o unutrašnjoj organizaciji predviđeni kao redovni poslovi Ministarstva i osiguranja da te poslove obavljaju oni uposlenici kojima su isti u opisu poslova i radnih zadataka;
- Potpisivanje ugovora o izvršenju dodijeljenih sredstava sa krajnjim korisnicima tekućih i kapitalnih transfera u kojima će se decidno definisati međusobna prava i obaveze;
- Poduzimanje aktivnosti na realizaciji sredstava za finansiranje naučno – istraživačkih projekata u cilju veće efikasnosti u realizaciji istih i mogućnosti praćenja namjenskog utroška dodijeljenih sredstava;
- Poduzimanje aktivnosti, u okviru svojih nadležnosti, i u saradnji sa nadležnim institucijama i organima kako bi se izvršili zaključci iz Odluke o prihvatljivosti i meritumu Doma za ljudska prava za BiH od 6. juna 2003. godine, broj CH/02/9628;
- Poduzimanje aktivnosti kako bi svi krajnji korisnici dostavili izvještaje o utrošku doznačenih sredstava iz tekućih transfera odobrenih Ministarstvu u 2007. i 2008. godini, kao i sačinjavanja izvještaja o izvršenju sredstava transfera, prema nadležnim institucijama sa osvrtom na ciljeve i efekte koji su postignuti doznačavanjem sredstava.

Ministarstvo je postupilo po preporukama, datim nakon obavljene revizije finansijskih izvještaja za 2008. godinu u dijelu:

- Sačinjavanja i dostavljanja realnih finansijskih planova Federalnom ministarstvu finansija, kao i usklađivanja dinamike izvršenja sa odobrenim planovima;
- Donošenja pisane procedure kojom se je jasno definisao način izbora i imenovanja članova stručnog tima recenzenata, u skladu sa članom 11. Pravilnika o postupku pripremanja i odobravanja udžbenika, priručnika i drugih nastavnih sredstava za osnovne i srednje škole;
- Vršnje raspodjele sredstava svih programa tekućih transfera, putem javnog oglašavanja, uz korištenje kriterija sa jasno utvrđenim parametrima koji su uglavnom bili mjerljivi i dokazivi, te bili ključ za bodovanje i određivanje visine sredstava koja su dodjeljena krajnjim korisnicima;
- Praćenje dinamike realizacije odobrenih projekata, prilikom izvršenja sredstava kapitalnog transfera iz 2008. godine, u cilju efikasnijeg angažovanja budžetskih sredstava, od strane krajnjih korisnika;
- Nastavka započetih aktivnosti obavljanja nadzora od strane Nadzornog tijela za kontrolu i praćenje namjenskog utroška odobrenih sredstava tekućih transfera za 2008. godinu, kao i Komisije za praćenje utroška sredstava za izgradnju i rekonstrukciju školskih objekata u FBiH, kao i prethodnog donošenja Plana obavljanja nadzora i na bazi definisanih kriterija, kod određenog dijela korisnika sredstava tekućih transfera obavljanja uvida u originalnu dokumentaciju na terenu;
- Vršnje uvida u cjelokupnu dokumentaciju, u vezi raspolaganja sredstvima sa računa za implementaciju „Projekta oporavka obrazovanja - OPEC FONDA“, preispitivanja opravdanosti njegovog egzistiranja u 2008. godini, te poduzimanja adekvatnih mjera i aktivnosti;

- Usklađivanja računovodstvenih knjige na kraju fiskalne godine i pravilnog vršenja popisa, odnosno usklađivanja stanja sredstava i njihovih izvora iskazanih u knjigovodstvu sa stvarnim stanjem utvrđenim popisom, u skladu sa članom 14. Uredbe o računovodstvu budžeta u FBiH i članom 69. Pravilnika o knjigovodstvu budžeta u FBiH.

S obzirom da Ministarstvo u revidiranoj godini nije imalo na raspolaganju dovoljno sredstava za finansiranje naučno – istraživačkih projekata, nismo mogli vršiti procjenu ispunjenja preporuke koja se odnosila na koordiniranje aktivnosti na polju nauke kako ne bi došlo do toga da različiti nivoi vlasti finansiraju iste projekte i kako bi se mogli adekvatno sagledati svi aspekti ulaganja u razvoj nauke u FBiH.

5. NALAZI I PREPORUKE

5.1 Sistem internih kontrola

Radi ostvarenja programskih ciljeva rada, kao i ekonomičnog, efikasnog i efektivnog trošenja javnih sredstava neophodno je imati uspostavljen funkcionalan sistem interne kontrole, koji je odgovornost menadžmenta. Faktor koji najviše utiče na funkcionalnost istog je povoljno kontrolno okruženje koje prvenstveno dolazi do izražaja kroz organizacionu strukturu, način rukovođenja, prenošenje ovlaštenja, vrednovanje rezultata rada, sistem nagrađivanja i poštivanje postojećih zakonskih propisa.

Pravilnik o unutrašnjoj organizaciji Ministarstva, kao pisana procedura čini temelj i sastavni je dio sistema internih kontrola jer se njime uređuje način rada i rukovođenja, kao i opis radnih mjesta za obavljanje poslova i zadataka. U martu 2009. godine izvršene su izmjene postojećeg Pravilnika, a istim su izvršene izmjene osnovnih organizacionih jedinica, s tim da je sistematizovani broj uposlenih ostao isti. Također je uvedeno i preraspodjelom unutar Ministarstva popunjeno, novo radno mjesto stručnog savjetnika za poslove pripreme, realizacije i nadzora sredstava tekućih transfera, a u čijem opisu poslova se nalazi kontinuirana kontrola i praćenje namjenskog utroška realizovanih sredstava tekućih transfera na osnovu dostavljenih izvještaja od strane korisnika sredstava. Međutim, konstatovali smo da je zbog internog premještanja, u Službi za finansijske poslove ostalo nepopunjeno radno mjesto stručnog savjetnika za finansijsko – računovodstvene poslove u čijem opisu radnog mjesta je bilo sastavljanje periodičnih i godišnjih obračuna, što je imalo za posljedicu da se je za izradu godišnjeg obračuna, kao i prošle godine, angažovao vanjski saradnik po osnovu ugovora o djelu.

Ministarstvo, iako je bilo obavezno, u skladu sa članom 62. Zakona o budžetima u FBiH, još uvijek nije izradilo Pravilnik o internim kontrolama - internim kontrolnim postupcima, kojim je trebalo da se za ključne procese u Ministarstvu definišu upravljački kontrolni postupci, računovodstvo internih kontrolnih postupaka, zatim postupci procjene rizika, postupci informisanja, komunikacija i nadgledanja. Uvidom u postojeći interni akt, koji reguliše poslove obavljanja interne kontrole i nadzora, a donesenim na osnovu člana 12. Zakona o trezoru u FBiH („Sl. novine FBiH“, broj 19/03), utvrdili smo da je istim predviđeno da se za provođenje internih kontrolnih postupaka i procedura imenuje Komisija za internu kontrolu i nadzor sa obavezom da ista ministrici podnosi izvještaj o izvršenoj kontroli i nadzoru, svakih šest mjeseci. Imenovana stalna Komisija za internu kontrolu i nadzor je, u skladu sa odredbama postojećeg akta, vršila kontrolu i sačinjavala periodične i Zbirni Izvještaj o izvršenom nadzoru u kojem se je fokusirala na sprovođenje aktivnosti, odnosno otklanjanje propusta i nepravilnosti po datim preporukama u Izvještaju o obavljenoj reviziji za prethodnu godinu. Na osnovu ranije uočenih nepravilnosti od strane revizije (i Komisije), vezano za neusklađenost postojećih pravilnika i procedura sa Pravilnikom o unutrašnjoj organizaciji, u toku godine izvršeno je njihovo usklađivanje, u smislu određivanja jasne uloge u obavljanju poslova i zadataka (normativi i upotreba službenih vozila, javni prihodi, plaće i naknade, reprezentacija). Komisija je također sačinila Nacrt Pravilnika o internim kontrolama, kojeg treba shvatiti kao polaznu osnovu, i istog je svakako, u narednom periodu, potrebno usvojiti i nadograditi, u dijelu procjene kontrolnog rizika, a sve kako bi se smanjila vjerovatnoća da će doći do neželjenih dešavanja zbog nedovoljnog funkcionisanja internih kontrola.

Nakon provedene revizije finansijskih izvještaja za 2009. godinu utvrđeno je da je sistem internih kontrola značajno unaprijeđen u odnosu na raniji period, ali da je bio, u pojedinim slučajevima, nezadovoljavajući, u dijelu dosljedne primjene zakonskih propisa i podzakonskih akata prilikom nabavke dijela stalnih sredstava (umjesto sa kapitalnih izdataka nabavljena iz sredstava transfera), isplata naknada

članovima komisija, usaglašavanja pomoćnih evidencija naplaćenih javnih prihoda po osnovu nostrifikacije diploma, kao i evidentiranja dijela poslovnih promjena.

Poboljšati funkcionisanje sistema internih kontrola u cilju otklanjanja utvrđenih nedostataka. Naglašavamo potrebu donošenja Pravilnika o internim kontrolama, kao i vršenja nadzora nad provođenjem pisanih internih kontrolnih postupaka i procedura.

5.2 Budžet za 2009. godinu

U Godišnjem izvještaju o izvršenju budžeta za 2009. godinu, iskazani su rashodi i izdaci u iznosu od **6.104.463 KM**, što predstavlja 95 % od 6.439.534 KM sredstava koja su operativnim budžetom stavljena na raspolaganje Ministarstvu. U navedenom iznosu operativnog budžeta sadržano je i 82.151 KM odobrenih sredstava iz Tekuće rezerve Vlade FBiH. Međutim, na traženje Ministarstva, Izmjenama i dopunama budžeta, istom nisu stavljena na raspolaganje tražena sredstva za komunalne usluge, u dovoljnom iznosu, tako da je na navedenoj poziciji na kraju godine ostalo neknjiženih obaveza u iznosu od 3.809 KM (telefoni, voda).

Struktura iskazanih rashoda i izdataka je sljedeća: tekući transferi 70,03% (4.274.950 KM), primanja zaposlenih 25,28% (1.543.379 KM), izdaci za materijal i usluge 4,39% (267.900 KM) i izdaci za nabavku opreme 0,30% (18.234 KM).

Pregled izvršenja budžeta dat je u prilogu br. 1 Izvještaja.

5.3 Izdaci za materijal i usluge

Izdaci za materijal i usluge iskazani su u iznosu od 263.580 KM što u odnosu na prethodnu godinu, kada su iznosili 494.320 KM predstavlja značajno smanjenje od 47 %. Najveće smanjenje troškova je izvršeno na pozicijama ugovorenih usluga (65 %), nabavke opreme (45 %), putnih troškova (40 %), izdataka za usluge prijevoza i goriva (35 %), nabavke materijala (14 %).

5.4 Tekući transferi

Prema Godišnjem finansijskom izvještaju Ministarstva, **izvršenje tekućih transfera** iskazano je u iznosu od 4.274.950 KM što predstavlja 95 % od 4.501.083 KM Izmjenama i dopunama Budžeta FBiH odobrenih sredstava. U okviru navedenog izvršenja, iskazano je izvršenje: **Transfera za finansiranje obrazovanja** 1.128.805 KM, **Transfera za oblast nauke od značaja za FBiH** 967.891 KM, **Transfera za finansiranje studentskog standarda** 919.764 KM, **Transfera za institucije nauke od značaja za Federaciju** 572.322 KM, **Transfera za implementaciju Bolonjskog procesa** 365.640 KM, **Transfera za Fond za studentske zajmove** 281.999 KM i **Transfera za Gender centar FBiH za prevenciju nasilja u porodici** 38.529 KM.

Vezano za raspodjelu sredstava tekućih transfera, Ministarstvo je u aprilu 2009. godine objavilo Obavještenje da je Vlada FBiH usvojila Program utroška sredstava s kriterijima raspodjele sredstava tekućih transfera, te da zainteresovani mogu podnijeti prijave za finansiranje/ sufinansiranje projekata na odgovarajućim obrascima uz koje su dužni priložiti traženu dokumentaciju. U maju 2009. godine, imenovane su komisije za raspodjelu sredstava tekućih transfera čiji zadatak je bio da obrade pristigle prijave po javnim pozivima. Sve komisije su, u skladu sa rješenjima o formiranju, donijele Poslovnike o radu komisija, te utvrdile opće i posebne kriterije za raspodjelu sredstava, razmatrale pristigle aplikacije programa i projekata, te u skladu sa utvrđenim kriterijima utvrdile prijedloge programa i projekata (po tačkama transfera), koji su razmatrani od strane Kolegija Ministarstva, nakon čega se odlučivalo o njihovom finansiranju.

Na osnovu provedene revizije, konstatovano je da je Ministarstvo ostvarilo značajan napredak prilikom raspodjele sredstava sredstava tekućih transfera na osnovu Programom utvrđenih kriterija, u odnosu na prošlu godinu. Međutim, za pojedine programe u okviru Transfera za oblast nauke od značaja za FBiH („Podrška istraživanju od značaja za FBiH“ i „Izdavački projekti u oblasti nauke, tehnologije i visokog obrazovanja“) utvrdili smo da definisani kriteriji u Programu utroška sredstava

nisu bili dovoljno jasni i mjerljivi, tako da nismo mogli potvrditi da je izbor krajnjih korisnika izvršen u skladu sa istim.

Realizacija tekućeg **Transfera za finansiranje studentskog standarda** je jednim dijelom izvršena na osnovu ispostavljenih faktura od strane studentskih centara za smještaj studenata, kao i odluka ministricе o dodjeli sredstava krajnjim korisnicima - studentima iz programom predviđenih kategorija (talentovani, učesnici na domaćim i međunarodnim takmičenjima, studentske organizacije, Romi, studenti sa invaliditetom, učesnicima nagradnih konkursa i takmičenja, studenti slabijeg socijalnog statusa). **Realizacija ostalih tekućih transfera** je uglavnom vršena na osnovu odluka o dodjeli sredstava, osim u slučajevima kada su sredstva doznačena univerzitetima za potrebe naučnog usavršavanja na postdiplomskom ili doktorskom studiju zaposlenog nastavnog kadra ili za uređenje prostora i nabavku opreme njihovih organizacionih jedinica (fakulteta) u kojim slučajevima se je potpisivao ugovor sa istima. Ugovori su potpisani i sa kantonalnim ministarstvima zaduženim za oblast obrazovanja, prilikom realizacije **programa Nabavke udžbenika za socijalno ugrožene učenike i učenike romske nacionalnosti, u okviru Transfera za finansiranje obrazovanja**. Ministarstvo je također, u 2009. godini, iz sredstava tekućih transfera, na osnovu potpisanih ugovora sa Nacionalnom i univerzitetskom bibliotekom BiH, finansiralo pristup međunarodnim naučnim bazama podataka i referentnim elektronskim naučnim časopisima, kao i rad operatora i održavanje sistema „Registra naučnih institucija naučnog kadra, naučnih projekata i infrastrukturnih ulaganja u FBiH“. **Mišljenja smo da je trebalo, za realizaciju i ostalih programa tekućih transfera, sa krajnjim korisnicima potpisivati ugovore o načinu izvršenja dodijeljenih sredstava u kojim će se decidno navoditi međusobna prava i obaveze, u cilju adekvatnog praćenja namjenskog korištenja doznačenih sredstava, kako bi se eventualno mogle poduzeti potrebne mjere prema onim korisnicima koji nenamjenski utroše sredstva ili u datom roku ne podnesu izvještaj o utrošku istih Ministarstvu.**

Obzirom da najvećem dijelu krajnjih korisnika dodijeljena sredstva iz tekućih transfera nisu bila doznačena u 2009. godini, isti u većini slučajeva nisu mogli dostaviti ni izvještaje o namjenskom utrošku sredstava što je imalo za posljedicu da se nije mogao izvršiti nadzor nad njihovim namjenskim utroškom do okončanja naše revizije.

Raspodjelu sredstava programa u okviru Transfera za oblast nauke od značaja za FBiH („Podrška istraživanju od značaja za FBiH“ i „Izdavački projekti u oblasti nauke, tehnologije i visokog obrazovanja“) i dalje vršiti putem javnog oglašavanja, uz korištenje kriterija sa jasno utvrđenim parametrima koji trebaju biti mjerljivi i dokazivi, kako bi bili ključ za bodovanje i poslužili za određivanje visine sredstava koja se dodjeljuju krajnjim korisnicima.

Sa krajnjim korisnicima tekućih transfera potpisivati ugovore o izvršenju dodijeljenih sredstava, u kojima će se decidno navoditi međusobna prava i obaveze, kako bi se eventualno mogle poduzeti adekvatne mjere prema onim korisnicima koji nenamjenski utroše sredstva ili u datom roku ne podnesu izvještaj o utrošku istih Ministarstvu.

5.4.1 Transfer za finansiranje obrazovanja

Transfer za finansiranje obrazovanja izvršen je u iznosu od 1.128.805 KM što predstavlja gotovo kompletno planirana sredstva.

Najznačajnije troškove ovog transfera predstavlja izdvajanje sredstava za **programe Nabavke udžbenika za učenike osnovnih škola u iznosu od 357.000 KM, čiji korisnici sredstva su, u skladu sa Programom utroška sredstava**, učenici romske nacionalnosti i socijalno ugrožene kategorije, za čije potrebe je trebalo izvršiti nabavku besplatnih udžbenika za prve (odnosno četvrte i šeste) razrede devetogodišnjeg osnovnog obrazovanja u kantonima u kojima se prvi put uvodi devetogodišnje obrazovanje ili u kojima se prvi put upisuju učenici u četvrti (odnosno u šesti) razred devetogodišnjeg osnovnog obrazovanja. Vezano za raspodjelu ovih sredstava, utvrdili smo da je imenovana Komisija za raspodjelu raspoloživih sredstava za ove namjene (350.000 KM) svakom kantonu odredila pripadajući iznos sredstava u zavisnosti od ukupnog broja učenika u prvom, četvrtom i šestom razredu devetogodišnjeg osnovnog obrazovanja. S obzirom na status Bosansko – podrinjskog i Posavskog kantona, te Kantona 10, koji se također subvencioniraju i za smještaj i ishranu studenata, komisija je zauzela stav da se njihov pripadajući dio dodatno uveća za 50 %, tako da su ukupno raspodijeljena sredstva za nabavku udžbenika uvećana za 7.000 KM i na kraju iznosila 357.000 KM. Vezano za izvještavanje o utrošku sredstava koja su doznačena

kantonima za navedene namjene, konstatovano je da su od strane istih pristigli finansijski izvještaji o utrošku sredstava, međutim, na osnovu uvida u odabrani uzorak (Sarajevski, Hercegovačko – neretvanski i Unsko – sanski kanton) **ne može se potvrditi da su Hercegovačko – neretvanski i Unsko – sanski kanton nabavljene udžbenike i dodijelili učenicima romske nacionalnosti i socijalno ugroženim kategorijama, što je bila prvenstvena namjena sredstava, obzirom da ti podaci nisu bili obuhvaćeni u dostavljenim izvještajima**, te smo mišljenja da bi Ministarstvo trebalo zatražiti potpunije izvještaje i izvršiti suštinsku kontrolu.

Poduzeti aktivnosti kako bi se u potpunosti opravdalo namjensko trošenje doznačenih sredstava kantonima, za nabavku udžbenika učenicima romske nacionalnosti i socijalno ugroženim kategorijama u prvim, četvrtim i šestim razredima devetogodišnjeg osnovnog obrazovanja.

5.4.2 Transfer za finansiranje studentskog standarda

Transfer za finansiranje studentskog standarda izvršen je u iznosu od 919.764 KM što predstavlja 99 % od odobrenih sredstava za ove namjene, u okviru kojih je najveći dio sredstava (737.289 KM ili 80 %) izdvojeno za **subvencioniranje smještaja i ishrane studenata**, smještenih u studentskim centrima u FBiH, koji dolaze iz manje razvijenih kantona (Kantona 10, Bosansko – podrinjskog i Posavskog kantona) i Republike Srpske.

Na ime podrške talentiranim studentima državljanima BiH, na osnovu javnog poziva izvršeno je dodjeljivanje godišnjih stipendija, u iznosu od po 2.000 KM, redovnim studentima završnih godina dodiplomskog studija u Federaciji BiH čiji prosjek ocjena u prethodnim godinama nije manji od 8,50, odnosno 3,80. Konstatovali smo da je na objavljeni javni poziv ukupno pristiglo 68 prijava od čega 55 nije odgovaralo zadatim kriterijima, dok je samo 13 kandidata ispunilo zadate uslove, kojima su sredstva i dodijeljena. **Prema navodima iz Zapisnika komisije za raspodjelu sredstava, Univerzitet u Zenici nije dostavio kandidature svojih studenata i pored obavještenja Ministarstva i usmenog kontaktiranja nadležnog službenika, te stoga nije vršen odabir kandidata ovog Univerziteta.**

Poduzeti dodatne aktivnosti kako bi se saradnja sa Univerzitetom u Zenici podigla na veći nivo, u cilju postizanja regionalne zastupljenosti svih studenata prilikom raspodjele sredstava transfera na ime podrške talentovanim studentima.

5.4.3 Transfer za oblast nauke od značaja za FBiH

Transfer za oblast nauke od značaja za Federaciju BiH izvršen je u iznosu od 967.891 KM, što u odnosu na odobrena sredstva za ove namjene od 1.145.999 KM predstavlja izvršenje od 84,45 %. Prvobitnim planom sredstva ovog transfera bila su odobrena u iznosu od 1.500.000 KM, a Ministarstvo je zbog smanjenja istog, u novembru 2009. godine izvršilo Izmjene i dopune usvojenog Programa utroška sredstava objavljenog u martu iste godine. Međutim, navedeno je imalo za posljedicu da su se, u pojedinim slučajevima, u skladu sa prvobitnim planom komisijski dodijeljena sredstva u okviru ovog transfera izvršila sa pozicije drugog transfera (199.000 KM, podrška naučnom usavršavanju na postdiplomskom i doktorskom studiju u okviru Transfera za implementaciju Bolonjskog procesa).

U svrhu realizacije programa utroška sredstava „**Podrška istraživanju od značaja za FBiH**“ raspodijeljeno je 27.100 KM, za 3 istraživačka projekta. Imajući u vidu da je odabir korisnika izvršen na osnovu procjene Komisije, a da predhodno nije definisano koja istraživanja se smatraju značajnim za FBiH, **ne možemo potvrditi, kao i prethodne godine da su utvrđeni kriteriji dosljedno ispoštovani prilikom raspodjele navedenih sredstava.**

Za **Izdavačke projekte u oblasti nauke, tehnologija i visokog obrazovanja**, čiji nosilac je Ministarstvo dodijeljeno je 35.831 KM, od čega za štampanje „Bosansko – romskog i Romsko – bosanskog rječnika“ 13.104 KM, za štampanje knjige „Kamen – materijal kontinuiteta i izražajnih mogućnosti“ 11.729 KM i za štampanje Bosansko - etnološkog rječnika 10.998 KM. Na osnovu uvida u Zapisnik sa sastanka Redakcijskog odbora, kojeg čine članovi Kolegija Ministrastva, **ne može se potvrditi da su prilikom raspodjele ovih sredstava dosljedno ispoštovani utvrđeni kriteriji iz programa utroška, obzirom da su isti bili previše uopšteni, kao i da Redakcijski odbor ima jasno propisanu proceduru prilikom donošenja prijedloga za raspodjelu sredstava.**

Za programe **Podrške naučnom usavršavanju na postdiplomskom i doktorskom studiju** državljana BiH, sa prebivalištem na području FBiH, ukupno su dodijeljena sredstva od 283.671 KM, od

čega za podnosiocima aplikacija koji ispunjavaju uslove i nisu zaposleni na visokoškolskim i naučnim institucijama 179.671 KM (48.000 KM doktoranti, 95.000 KM magistranti i 36.671 KM porez i doprinos na dodatna primanja). Za iste namjene, u okviru ovog transfera, doznačeno je 104.000 KM na račune visokoškolskih ustanova (univerziteta) i naučnih institucija, za uposlenike (doktorante i magistrante) koje su isti kandidovali u skladu sa dodijeljenim sredstvima od strane Ministarstva (proporcionalno broju organizacionih jedinica koje imaju u svom sastavu, kao i broja studenata, ali ne više od 5.000 KM po organizacionoj jedinici). Međutim, kako je pristigli broj aplikacija bio veći u odnosu na sredstva koja su Ministarstvu na ovoj poziciji ostala na raspolaganju, nakon rebalansa budžeta (kada su ista umanjena za 354.000 KM), Komisija za raspodjelu sredstava je zauzela stav da se nedostajući dio sredstava od 199.000 KM - za Univerzitet u Sarajevu, Zenici i Bihaću i Univerzitet „Džemal Bijedić“ u Mostaru dodijeli sa Transfera za implementaciju Bolonjskog procesa, što nije u skladu sa Programom utroška sredstava. **Na osnovu naprijed navedenog, konstatovano je da ukupno izvršenje dodijeljenih sredstava za naučno usavršavanje na postdiplomskom i doktorskom studiju iznosi 482.671 KM, na koji način su svakom kandidatu koji je zadovoljio uslove iz programa, bila dodijeljena sredstva u iznosu od po 2.000 KM za doktorski studij, odnosno po 1.000 KM za magistrante.**

Iz sredstava rezervi, za interventne potrebe u oblasti nauke, na osnovu odluka ministrice dodijeljeno je 75.527 KM, od čega su najznačajnije iznose dobili: Akademija nauka i umjetnosti BiH za finansiranje projekta „Multimedijalni amfiteatar ANUBiH“ (15.000 KM), Institut za genetičko istraživanje za projekat „Genotipizacija lokalnih humanih populacija u FBiH“ (10.000 KM), Korisnici po žalbama iz 2008. godine na Javni poziv za finansiranje dokorskog i magistarskog studija (13.550 KM), 11 aplikantata za sufinansiranje dodiplomskog studija po 1.231 KM (13.541 KM), JU Pravni fakultet u Bihaću za sufinansiranje učešća u naučno - tehničkoj saradnji (5.000 KM) i Fakultet Informacijskih tehnologija u Mostaru za testiranje aplikacije E Dnevnik (4.000 KM). U skladu sa Programom utroška sredstava, navedena sredstva se raspodjeljuju za projekte koji nisu predviđeni programom i za podršku projektima koji u potpunosti ne ispunjavaju propisane kriterije, ali se u cilju regionalne zastupljenosti nauke, na osnovu odluke ministrice, prihvata njihovo finansiranje. Imajući u vidu naprijed navedene odredbe Programa, obzirom da nisu bili utvrđeni kriteriji, ne može se potvrditi adekvatnost načina raspodjele interventnih sredstava iz oblasti nauke krajnjim korisnicima.

Za raspodjelu sredstava na ime „Podrške istraživanju od značaja za FBiH“ i programa „Izdavačkih projekata u oblasti nauke, tehnologije i visokog obrazovanja“ definisati jasnije kriterije koji se mogu dokazati i mjeriti, a na osnovu kojih će se izvršiti odabir korisnika i odrediti visina sredstava koja će isti dobiti.

Potrebno je poduzeti aktivnosti kako bi se za sve transfere za koje je zaduženo Ministarstvo, utvrdila pravila raspodjele i oblasti koje će se pokrivati iz sredstava svakog transfera, a u cilju onemogućavanja da se isti program istovremeno finansira iz sredstava dva transfera odobrenih Ministarstvu.

Utvrditi kriterije za raspodjelu sredstava rezervi u oblasti nauke od značaja za FBiH, te obezbijediti dosljednu primjenu istih.

5.4.4 Transfer za institucije nauke od značaja za FBiH

Transfer za institucije nauke od značaja za FBiH izvršen je u iznosu od 572.322 KM koliko je bilo i planirano za navedene namjene. U okviru navedenog transfera, 534.322 KM je utrošeno na ime podrške javnim naučnim i visokoškolskim ustanovama (univerzitetima) od značaja za Federaciju (kroz uređenje prostora i nabavku prioritetne opreme) kojima su finansijska sredstva dodijeljena kumulativno, proporcionalno broju organizacionih jedinica, koje imaju u svom sastavu, na osnovu obrazloženih zahtjeva od strane istih. Pristigli zahtjevi (aplikacije) od strane javnih naučnih i visokoškolskih ustanova (univerziteta) su urađeni na osnovu dostavljenog obavještenja od strane Ministarstva o iznosu sredstava koja se, u skladu sa kriterijima iz Programa utroška sredstava, raspodjeljuju na 9 naučnih ustanova i instituta, kao i 6 visokoškolskih ustanova (univerziteta). **Obzirom da je najveći dio krajnjih korisnika dodijeljena sredstva dobio tek u novembru 2009. godine, isto je imalo za posljedicu kašnjenje u implementaciji prihvaćenih programa, kao i na dostavljanje izvještaja prema Ministarstvu od strane istih.**

Ranijih godina smo sa pozicije ovog transfera bilježili značajna izdvajanja na ime naučno – istraživačkih projekata, čijem finansiranju je obavezno prethodilo pozitivno mišljenje od strane Savjeta za nauku, kojeg je imenovala ministrica iz reda naučnih radnika. Vezano za realizaciju **33 naučno – istraživačka projekta koji su finansirani na teret budžetske 2005/2006. godine**, odnosno vršenje nadzora nad namjenskim utroškom istih, u obavljenoj reviziji prethodne godine smo utvrdili da 5 voditelja projekata nisu, i pored opomena i urgencija od strane Ministarstva, dostavili izvještaje o namjenskom utrošku doznačenih sredstava. **Nije nam prezentirana dokumentacija da je Ministarstvo prema istima poduzimalo odgovarajuće mjere.** Pored izvještaja o namjenskom utrošku sredstava, voditelji projekata su trebali dostaviti i stručne izvještaje u vezi naučno – istraživačkih projekata finansiranih iz ovih sredstava, a za iste je Savjet za nauku, u skladu sa aktom o formiranju trebao dati mišljenje o postignutim rezultatima. U obavljenoj reviziji prethodne godine utvrdili smo da je, od dostavljenih 24 stručna izvještaja, Savjet za nauku razmotrio njih 19 i dao mišljenje da je samo 5 projekata u potpunosti uspješno realizovano, a za ostalih 14 su iznijeli stav da iz dostavljene dokumentacije ne mogu dati mišljenje da li je projekat rezultirao naučnim radom ili ne, nakon čega je Ministarstvo od voditelja projekata zatražilo dostavljanje dodatne dokumentacije. **Nije nam prezentirana dokumentacija o broju dostavljenih stručnih izvještaja o realizaciji naučno – istraživačkih projekata finansiranih 2005/2006. godine.**

Uvidom u Izvještaj o namjenskom utrošku sredstava za finansiranje naučno – istraživačkih projekata, doznačenih na teret budžetske 2007. godine, kada je za finansiranje 47 projekata dodijeljeno 877.879 KM, konstatovano je da 1 voditelj projekta (sa Filozofskog fakulteta) nije dostavio nikakav izvještaj kojim bi pravdao namjenski utrošak sredstava doznačenih za projekat „Likovi srednjovjekovne Bosne“. Od pristiglih 46 izvještaja, komisija je u potpunosti prihvatila namjenski utrošak sredstava samo za njih 21 i djelimični utrošak za njih 7. Međutim, 10 izvještaja nije prihvaćeno zbog nedostavljanja potpune finansijske dokumentacije, 6 voditelja projekata dostavilo je izvještaje u kojima traže prolongiranje roka implementacije istih, dok su 2 voditelja tražila prenamjenu sredstava. **Nije nam prezentirana dokumentacija o broju dostavljenih stručnih izvještaja o realizaciji nastavno – naučnih projekata finansiranih na teret 2007. godine, kako bi isti bili vrednovani od strane Savjeta za nauku.**

U vezi dostavljenih sredstava za finansiranje naučno – istraživačkih projekata dodijeljenih na teret budžetske 2008. godine za 54 projekta u ukupnom iznosu od 1.002.709 KM, utvrdili smo da su ugovori sa voditeljima projekata (zbog neizvjesne situacije sa budžetom) bili potpisani tek početkom 2009. godine, kao i da su im sredstva doznačena tek polovinom 2009. godine, što je uticalo na implementaciju projekata, odnosno na njeno kašnjenje, kao i na izvještavanje i vršenje nadzora od strane Ministarstva nad namjenskim utroškom ovih sredstava.

U budžetskoj 2009. godini, Ministarstvo nije vršilo finansiranje naučno – istraživačkih projekata, zbog značajno manje odobrenih sredstava za ove namjene, u odnosu na prethodnu godinu. Međutim, na osnovu Rješenja ministricе, u oktobru 2009. godine, izvršeno je imenovanje predsjednika i članova novog Savjeta za nauku sa zadatkom da predlaže mjere za unapređenje naučne djelatnosti u FBiH, da po ovlaštenju ministricе ostvaruje kontakte i saradnju, te zastupa zvanične stavove u vezi sa strateškim opredjeljenjima i aktivnostima Ministarstva iz svog djelokruga rada u javnosti, pripremi Projektni zadatak za izradu Strategije razvoja nauke u FBiH, razmatra izvještaje i daje ocjenu naučnih rezultata projekata finansiranih od strane Ministarstva u prethodnom periodu i razmatra žalbe prispjele na rezultate Konkursa za finansiranje naučno – istraživačkih projekata u FBiH u 2008. godini. Prema prezentiranim Zapisnicima o radu Savjeta za nauku, do momenta završetka konačne revizije Ministarstva, isti je razmotrio pristigle žalbe i rezultate Konkursa iz 2008. godine, od kojih je dvije pozitivno riješio, tako da će sredstva za finansiranje ovih projekata biti dodijeljena u narednoj 2010. godini. Također je pripremljen i usvojen sadržaj projektnog zadatka „Strategije razvoja nauke u FBiH“, način njegove realizacije i predloženi autori za realizaciju pojedinih poglavlja, za koju su u 2010. godini planirana sredstva u iznosu od 119.000 KM. Članovima Savjeta za nauku je na osnovu Rješenja ministricе isplaćena naknada za rad u mjesecu novembru i decembru 2009. godine, u iznosu od 5.765 KM sa Transfera za oblast nauke u FBiH.

Poduzeti adekvatne aktivnosti kako bi se u potpunosti opravdao namjenski utrošak sredstava doznačenih za realizaciju naučno – istraživačkih projekata u 2005/2006. i 2007. godini, a po potrebi i izvijestile nadležne institucije, u cilju zaštite javnih sredstava i dosljednih provedbi propisanih odredbi iz ugovora o realizaciji naučno – istraživačkih projekata.

Potrebno je da se u skladu sa zaključenim ugovorima o finansiranju naučno – istraživačkih projekata izvrši konačna ocjena rada nosioca naučno – istraživačkih projekata finansiranih u prethodnom periodu, kao i u 2008. godini.

Potrebno je aktivnosti na realizaciji sredstava za finansiranje naučno – istraživačkih projekata poduzimati na vrijeme u cilju veće efikasnosti u realizaciji istih i mogućnosti praćenja namjenskog utroška dodijeljenih sredstava.

Potrebno je da Ministarstvo ubuduće koordinira aktivnosti na polju nauke kako ne bi došlo do toga da različiti nivoi vlasti finansiraju iste projekte, te kako bi se mogli adekvatno sagledati svi aspekti ulaganja u razvoj nauke u FBiH.

5.5 Nadzor nad namjenskim trošenjem sredstava transfera iz 2007. i 2008. godine

U obavljenoj reviziji prethodne godine utvrdili smo da dodijeljena budžetska sredstva iz kapitalnog transfera, nisu stavljena na raspolaganje velikom broju krajnjih korisnika do kraja 2008. godine (63 korisnika, 14.409.000 KM), tako da isti, u tok periodu, nisu mogli poduzimati aktivnosti u dijelu realizacije, kao i izvještavanja o utrošku istih. **Vezano za vršenje nadzora nad namjenskim utroškom doznačenih sredstava iz kapitalnog transfera, imenovana je je stalna Komisija za praćenje utroška sredstava za izgradnju i rekonstrukciju školskih objekata u FBiH** koja je na osnovu dostavljenih izvještaja o namjenskom utrošku sredstava i obilaska većine objekata izvršila nadzor nad namjenskim utroškom doznačenih sredstava u iznosu od 3.430.000 KM, na teret budžetske 2007. godine i 17.870.000 KM doznačenih sredstava na teret budžetske 2008. godine. Navedena kontrola namjenskog utroška je pored finansijskog obuhvatila i tehničko – građevinski aspekt.

Značajnim smatramo istaći da je u okviru kapitalnog transfera na teret budžetske 2008. godine (17.870.000 KM) izvršeno doznačavanje sredstava u iznosu od 5.000.000 KM Općini Travnik za izgradnju SŠC u Travniku (u vezi realizacije Odluke Doma za ljudska prava), 400.000 KM Gradu Mostaru za početak izgradnje Osnovne škole „Zalik“ u Mostaru i 30.000 KM Organizaciji demobilisanih boraca odbrambeno – oslobodilačkog rada 1992 – 1995 Općine Centar, za realizaciju projekta Sanacije i adaptacije dječijeg obdaništa „Razigrani dani“, u naselju Jezero u Sarajevu.

Uvidom u dokumentaciju, utvrdili smo da su sredstava **za izgradnju SŠC u Travniku dodijeljena na osnovu odluke Doma za ljudska prava CH/02/9628**, donesene na zahtjev Vrhbosanske nadbiskupije, koja je 04.09.2003. godine postala obavezujuća, a kojom je naloženo premještanje državnih srednjih škola iz zgrade Nadbiskupske Gimnazije u Travniku. Obzirom da je ugovoreni rok (prema ugovoru kojeg su u ime Vlade FBiH zaključili Federalno ministarstvo prostornog uređenja i okoliša i Vrhbosanska nadbiskupija 21.05.2004. godine) za potpuno oslobađanje zgrade Nadbiskupske gimnazije istekao 01.07.2006. godine, a za čiju je realizaciju preduslov bila izgradnja novog Srednjoškolskog centra u Travniku, Vlada FBiH je u 2008. godini, na Prijedlog Federalnog ministarstva obrazovanja i nauke, donijela Odluku kojom je Opštini Travnik dodijelila 5.000.000 KM za sufinansiranje Projekta izgradnje Srednjoškolskog centra u Travniku, međutim, sredstva za realizaciju navedene odluke su doznačena tek sredinom 2009. godine. Nije nam prezentirana o namjenskom utrošku ovih sredstava, odnosno da li su ista uložena u izgradnju objekta ili se nalaze na računu Općine. **Prezentirana je dokumentacija da ukupni troškovi realizacije Projekta izmještanja srednjih škola iz zgrade Nadbiskupske Gimnazije u Travniku iznose 17.000.000 KM, tako da ukupno nedostajuća sredstva za završetak realizacije ovog projekta iznose 12.000.000 KM.** U vezi rješavanja ovog pitanja, Ministarstvo je u avgustu 2009. godine Vladi FBiH dostavilo Informaciju i prijedloge zaključaka, ali isti nisu bili usvojeni od strane iste. Tek 01.02.2010. godine Vlada FBiH ponovo razmatrajući Informaciju (i urgenciju) od strane Ministarstva donosi Zaključak, V broj 86/2010, kojim se opredjeljuje da učestvuje u osiguranju kreditnih sredstava za izgradnju Srednjoškolskog centra u Travniku (12.000.000 KM), te daje ovlaštenje premijeru FBiH da sa Vladom Srednjobosanskog kantona i Općinom Travnik potpiše Sporazum, u kojem će se dogovoriti i način povrata kreditnih sredstava, kao i da sa Vrhbosanskom nadbiskupijom potpiše Aneks ugovora (protokola) od 21.05.2004. godine o koracima koje treba poduzeti, u smislu određivanja realnog roka za izmještanje državnih škola i potpuno oslobađanje zgrade Nadbiskupske gimnazije u Travniku. **Prema prezentiranoj dokumentaciji, u vrijeme završetka konačne revizije, nije bilo realizacije navedenog zaključka Vlade FBiH, a 12.03.2010. godine Vrhbosanska nadbiskupija je Općinskom sudu Travnik uputila Prijedlog za donošenje Rješenja o izvršenju izvršne Odluke Doma za ljudska prava BiH.**

Potrebno je da Ministarstvo, u okviru svojih nadležnosti, i u saradnji sa nadležnim institucijama i organima i dalje poduzima aktivnosti u cilju izvršavanja zaključaka iz Odluke o prihvatljivosti i meritumu Doma za ljudska prava za BiH od 6. juna 2003. godine, broj CH/02/9628, kao i realizacije Zaključka Vlade FBiH od 01.02.2010. godine.

U skladu sa potpisanim ugovorom između Ministarstva i Grada Mostara, **doznačena sredstva u iznosu od 400.000 KM, za početak izgradnje Osnovne škole „Zalik“** u Mostaru, iz kapitalnog transfera na teret budžetske 2008. godine, trebala su biti realizovana do kraja 2009. godine. Međutim, na osnovu uvida u dostavljeni izvještaj (informaciju) Grada Mostara od 29.01.2010. godine konstatovano je da, iz razloga nedostatnosti sredstava u 2009. godini, Grad nije ušao u implementaciju ovog projekta, te se otpočinjanje radova i dodatna sredstva za izgradnju ovog projekta planiraju osigurati u Budžetu Grada za 2010. godinu. **Također smo utvrdili da Grad Mostar još uvijek nije, u skladu sa zaključenim ugovorom sa Ministarstvom, implementirao doznačena sredstva na teret budžetske 2007. godine u iznosu od 3.000.000 KM za Projekat rekonstrukcije zgrade Gradske vijećnice Mostar.** Naime, prema dostavljenim izvještajima od strane Grada, realizacija projekta kasni iz razloga dugotrajnosti izbora najpovoljnijeg izvođača radova (vođena dva žalbena postupka), odnosno dugotrajnih žalbenih postupaka koji se vode u skladu sa Zakonom o javnim nabavkama BiH. O navedenom Ministarstvo je u oktobru 2009. godine izvjestilo Federalno ministarstvo finansija, a u februaru 2010. godine i Vladu FBiH, koja je 24.03.2010. godine donijela Zaključak V broj 239/2010, kojim daje saglasnost Ministarstvu da sa gradonačelnikom Mostara potpiše anekse na Ugovor o finansiranju rekonstrukcije zgrade Gradske vijećnice Mostar i na Ugovor o sufinansiranju izgradnje zgrade Osnovne škole „Zalik“ Mostar, u smislu utvrđivanja novog roka realizacije projekta za oba navedena ugovora. Aneksi na navedene ugovore su potpisani 30.04.2010. godine, a istima je utvrđeno da će Grad doznačena sredstva utrošiti u skladu sa namjenom i prema pozitivnim zakonskim propisima, zaključno sa 2011. godinom, o čemu će podnijeti izvještaj sa finansijskog i tehničkog aspekta.

Potrebno je da Ministarstvo, u skladu sa Zaključkom Vlade FBiH, pravovremeno poduzme adekvatne aktivnosti, u cilju namjenskog trošenja doznačenih sredstava Gradu Mostaru za realizaciju Projekta rekonstrukcije zgrade Gradske vijećnice Mostar (3.000.000 KM) i Projekta za početak izgradnje Osnovne škole „Zalik“ u Mostaru (400.000 KM).

Ministarstvo je sa pozicije „Učešće Vlade FBiH u sufinansiranju projekata kantona i lokalne zajednice u izgradnji i rekonstrukciji osnovnih i srednjih škola i dječijih vrtića“ u 2008. godini dodijelilo sredstva u iznosu od 30.000 KM za realizaciju projekta **Sanacije i adaptacije dječijeg obdaništa „Razigrani dani“ u naselju Jezero u Sarajevu** - Organizaciji demobilisanih boraca odbrambeno – oslobodilačkog rada 1992 – 1995 Općine Centar, a isti su trebali koristiti manji dio prostora navedenog objekta (49 %), a ostatak JU „Djeca Sarajeva“, u skladu sa zaključkom Upravnog odbora JU „Djeca Sarajeva“ Sarajevo. Uvidom u dokumentaciju koja se odnosi na izvršeni nadzor od strane Ministarstva nad namjenskim utroškom ovih sredstava utvrdili smo da po pismenim opomenama od strane Ministarstva, navedena organizacija nije dostavila izvještaj kojim bi opravdala namjenski utrošak sredstava, da je Komisija za nadzor 22.10.2009. godine izvršila obilazak terena gdje je zapisnički konstatovano da su izvedeni radovi minimalni, te da njihova cijena koštanja nije ni približna doznačenom iznosu. Imajući u vidu navedeno, od strane Ministarstva do okončanja revizije nisu poduzimane adekvatne aktivnosti kako bi se osiguralo namjensko trošenje doznačenih sredstava ili njihov povrat u Budžet FBiH, te istom preporučujemo poduzimanje adekvatnih aktivnosti, u skladu sa zakonskim propisima.

Potrebno je da Ministarstvo, u skladu sa zakonskim propisima, u okviru svojih nadležnosti, poduzme adekvatne aktivnosti prema nadležnim institucijama, imajući u vidu da se ne može potvrditi namjensko trošenje sredstava od strane Organizacije demobilisanih boraca odbrambeno – oslobodilačkog rada 1992 – 1995 Općine Centar kojoj su dodijeljena sredstva za realizaciju projekta Sanacije i adaptacije dječijeg obdaništa „Razigrani dani“ u naselju Jezero u Sarajevu u iznosu od 30.000 KM.

U Izvještaju prethodne godine, utvrdili smo da je od ukupno 1416 krajnjih korisnika kojima su dodijeljena sredstva u iznosu od 9.106.666 KM iz tekućih transfera ministarstva, za njih samo 161 izvršena uplata sredstva (2.666.076 KM) krajem 2008. godine, dok su ostali najvećim dijelom sredstva dobili u aprilu 2009. godine, tako da je najveći broj njih kasnio sa implementacijom projekata. **Vezano za vršenje nadzora nad namjenskim utroškom doznačenih sredstava iz tekućih transfera, imenovane su dvije komisije,**

jedna za praćenje namjenskog utroška sredstava transfera iz oblasti osnovnog i srednjeg obrazovanja, a druga za oblast nauke i visokog obrazovanja. Na osnovu prezentiranih Izvještaja o namjenskom utrošku konstatovano je da je od 734 korisnika sredstava tekućih transfera njih samo 330 dostavilo izvještaje o namjenskom utrošku (45 %). Prema korisnicima koji nisu dostavili izvještaje o namjenskom utrošku sredstava tekućih transfera, Ministarstvo nije slalo opomene, urgencije ili poduzimalo neke druge mjere. Imanovana komisija je za period januar – mart 2010. godine donijela Plan neposrednog nadzora nad namjenskim utroškom sredstava Transfera za nauku koji još uvijek nije bio u potpunosti završen.

Poduzeti aktivnosti kako bi svi krajnji korisnici dostavili izvještaje o utrošku doznačenih sredstava iz tekućih transfera odobrenih Ministarstvu u 2008. i 2009. godini. Potrebno je da Nadzorna tijela za kontrolu i praćenje namjenskog utroška odobrenih sredstava tekućih transfera, kao i Komisija za praćenje utroška sredstava za izgradnju i rekonstrukciju školskih objekata u FBiH nastave započete aktivnosti obavljanja nadzora, u skladu sa aktom o formiranju istih.

5.6 Fond za studentske zajmove

U okviru tekućih transfera Ministarstva iskazan je transfer Fondu za studentske zajmove u iznosu od 281.999 KM. U skladu sa Zakonom o udruženjima i fondacijama, Vlada FBiH je osnovala Fond za studentske zajmove s ciljem osiguranja podrške i omogućavanja studiranja studentima. Studentski zajmovi su beskamatna namjenska sredstva za pokrivanje osnovnih troškova studiranja s obavezom vraćanja po prestanku ili završetku studija u roku i na način određen Ugovorom o dodjeli studentskog zajma, između Fonda, odnosno poslovne banke Fonda, i studenta – korisnika zajma. Vlada FBiH kao osnivač imenuje Upravni odbor i donosi status kojim se uređuju bitna pitanja za rad istog. Broj i iznos studentskih zajmova koji se dodjeljuje u pojedinačnoj akademskoj godini utvrđuje Upravni odbor Fonda. Vlada FBiH je 24.03.2010. godine usvojila Izvještaj o radu i Finansijski izvještaj Fonda za 2009. godinu. Prema prezentiranim podacima u Izvještaju o radu, Fond je u revidiranoj godini imao na raspolaganju 2.225.158 KM, od čega se na prihode iz prethodnih godina odnosi 1.442.439 KM, doznačena sredstva od strane Ministarstva iz Budžeta FBiH, na teret 2008. godine 500.000 KM i doznačena sredstva na teret 2009. godine 281.999 KM. Ukupni rashodi Fonda na kraju 2009. godine su iznosili 1.068.728 KM, od čega je 1.012.500 KM sredstava plasirano preko NLB Tuzlanske banke, za 405 dodijeljenih studentskih zajmova (10 mjeseci po 250 KM), po osnovu dva provedena javna poziva. U skladu sa članom 47. Zakona o udruženjima i fondacijama nadzor nad zakonitošću rada udruženja i fondacija vrši nadležno ministarstvo u čije područje spada praćenje stanja u oblasti na koju se odnosi djelatnost udruženja i fondacije. Statutom Fonda za studentske zajmove je propisano da Ministarstvo obrazovanja i nauke i Federalno ministarstvo finansija vrše nadzor nad namjenskim korištenjem i raspolaganjem sredstvima Fonda. U vrijeme obavljanja konačne revizije Ministarstva, od strane Fonda za studentske zajmove bio je podnesen Izvještaj o radu sa godišnjim obračunom za 2009. godinu, kao i Plan poslovanja za 2010. godinu, i iste je Ministarstvo, uz propratni dopis, uputilo na Vladu FBiH, koja je iste i usvojila. Imajući u vidu navedeno, zakonske odredbe i prezentiranu dokumentaciju, **nismo u mogućnosti potvrditi da je Federalno ministarstvo obrazovanja i nauke izvršilo nadzor nad namjenskim korištenjem i raspolaganjem sredstvima Fonda za 2009. godinu. Nadzor za 2009. godinu nije izvršen ni od strane Federalnog ministarstva finansija.**

Potrebno je vršiti nadzor nad namjenskim korištenjem i raspolaganjem sredstvima Fonda za studentske zajmove, u skladu sa članom 47. Zakona o udruženjima i fondacijama. Pri tome je nužno osigurati da se predmetni nadzor izvrši prije slanja Izvještaja o radu Fonda Vladi FBiH (kao osnivaču), što je svakako potrebno uskladiti sa razmatranjem godišnjeg izvještaja o izvršenju Budžeta FBiH za predmetnu godinu.

5.7 KOMENTAR

Na dostavljeni Nacrt Izvještaja o obavljenoj reviziji finansijskih izvještaja Federalnog ministarstva obrazovanja i nauke za 2009. godinu, Ministarstvo se očitovalo dopisom Broj: 08–14–4602/10 od 10.06.2010. U navedenom očitovanju Ministarstvo je konstatovalo da nema suštinskih primjedbi na nalaze izvršene revizije. Ministarstvo je, također, u očitovanju navelo da će u skladu sa

preporukama iz Izvještaja o reviziji finansijskih izvještaja za 2009. godinu poduzeti sve neophodne aktivnosti u cilju korekcije svih navedenih nepravilnosti i propusta te da će o poduzetim aktivnostima pravovremeno obavjestiti Ured za reviziju institucija u FBiH.

Rukovodilac Sektora za finansijsku reviziju:

Munib Ovčina, dipl. oec.

Vođa tima:

Nasiha Biberović, dipl. oec.

Član tima:

Belma Mušinović, dipl. oec.

Prilog br. 1.
Izvršenje budžeta Federalnog ministarstva obrazovanja i nauke na dan 31.12.2009. godine
Izraženo u KM

Red. Broj	Vrsta rashoda	Budžet za 2009. Godinu	Izmjene Budžeta za 2009. godinu ¹	Tekuća rezerva u 2009. godini ²	Zakonska preraspodjela sredstava ³	Smanjenje /povećanje zakonskog budžeta ⁴	Operativni budžet za 2009. god. ⁵ (od 4 do 6)	Izvršenje Budžeta za 2009. godinu ⁶	Izvršenje Budžeta za 2008.godinu
1	2	3	4	5	6	7	7	8	9
I	Tekući i izdaci (zbir od 1 do 12)	1.640.231	1.835.300	82.151			1.917.451	1.811.271	2.076.547
1.	Bruto plate zaposlenih	811.134	1.089.695	45.959			1.135.654	1.128.367	1.083.548
2.	Naknade troškova zaposlenih	309.738	270.895	36.192			307.087	296.534	379.090
3.	Doprinosi poslodavca	96.722	134.681				134.681	118.478	119.485
4.	Putni troškovi	53.776	45.180				45.180	35.847	51.858
5.	Izdaci za energiju	9.218	5.689				5.689	2.919	3.040
6.	Izdaci za komunalne usluge	46.094	56.439				56.439	56.439	55.925
7.	Nabavka materijala	16.348	31.348				31.348	27.815	32.503
8.	Izdaci za usluge prev. i goriva	26.888	22.589				22.589	13.342	20.030
9.	Unajmljivanje imovine I opreme	3.995	3.995				3.995	1.905	1.785
10.	Izdaci za tekuće održavanje	22.279	22.746				22.746	18.409	20.133
11.	Osiguranje i bankarske usluge	5.839	5.103				5.103	4.888	4.928
12.	Ugovorene usluge	283.150	146.940				146.940	106.336	304.222
II	Tekući transferi (zbir od 1-10))	5.759.700	4.501.083				4.501.083	4.274.950	17.105.723
1.	Transfer za finansiranje studentskog standarda	1.000.000	928.500				928.500	919.764	1.629.428
2.	Transfer za finansiranje obrazovanja	1.451.300	1.134.917				1.134.917	1.128.805	1.373.042
3.	Transfer za implementaciju Bolonjskog procesa	500.000	391.000				391.000	365.639	999.806
4.	Transfer za Gender centar FBiH za prevenciju nasilja u porodici	58.400	45.669				45.669	38.530	0
5.	Transfer za oblast nauke od značaja za Federaciju	1.500.000	1.145.999				1.145.999	967.891	2.578.916
6.	Transfer za institucije nauke od značaja za Federaciju	750.000	572.999				572.999	572.322	1.641.110

¹ Zakon o izmjenama i dopunama Budžeta FBiH za 2009. godinu („Sl. novine FBiH“ broj 81/09)

² Ministarstvu su iz tekuće rezerve Vlade FBiH odobrena sredstva u iznosu od 82.152 KM koja nisu obuhvaćena Izmjenama i dopunama Budžeta za 2009. godinu.

³ Podaci preuzeti sa rješenja Federalnog ministarstva finansija donesenog u skladu sa Zakonom o budžetima u FBiH i Zakonom o izvršavanju budžeta za 2009. godinu.

⁴ Povećanje zakonski odobrenog budžeta izvršeno od strane Ministarstva finansija u iznosu od 1.000 KM.

⁵ Ukupno odobreni operativni budžet na dan 31.12.2009. godine.

⁶ Podatak je preuzet iz finansijskih izvještaja Ministarstva a isti odgovara podacima sa obrasca Analitičkog bruto bilansa ili Izvještaja – analiza raspoloživih sredstava (na poziciji „Stvarni iznos“, koji odgovara izvršenju budžeta za 2009. godinu.

7.	Transfer za Fond za studentske zajmove	500.000	281.999			281.999	281.999	500.000
8.	Transfer za Agenciju za obrazovanje							300.000
9.	Transfer za biblioteku za slijepa i slabovidna lica							83.420
10	Transfer za udžbenike osnovnog obrazovanja							8.000.000
	Kapitalni grantovi	0	0			0	0	18.020.000
	Učešće Vlade u sufin. projekata kantonalnih i lokalnih zajednica - izgradnja škola i dječijih vrtića							18.020.000
III	Kapitalni izdaci	40.000	20.000		+1.000	21.000	18.234	33.350
1.	Nabavka opreme	40.000	20.000		+1.000	21.000	18.234	33.350
A	Ukupno rashodi i izdaci (I+II+III)	7.439.931	6.356.383	82.151	1.000	6.439.534	6.104.463	37.235.619
B	Neraspoređeni višak prihoda i rashoda¹		20.786.275					
A+B	Ukupno odobrena sredstva	7.439.931	27.142.658	82.151	+1.000	6.439.534	6.104.463	37.235.619
	Broj zaposlenih	50	46			46	47	48

¹ Budžetom FBiH za 2009. godinu odobrena sredstva na poziciji „Višak rashoda nad prihodima u iznosu od 20.786.275 KM nisu bila na raspolaganju Federalnom ministarstvu obrazovanja i nauke, a realizacija istih izvršena od strane Federalnog ministarstva finansija.